

ଯାକୁବ ଲିଖିତ ପତ୍ର ଯାକୁବ ଲେକତାଦ୍ ଟିଟି ଯାକୁବ ବଇ ବିଷୟରେ ଅଣ୍ଟାୟ ପଦ୍

ଯାକୁବ ବଇ ଯାକୁବ ପେଦେରତେ କାର୍ଜାମାନ୍ ଝେରଣ୍ ନାରୁଣ୍ ତଡ୍, ଲେକା ଆଡ୍ତେ । ଇ ଯାକୁବ ସମ୍ବାବନା ଜିସୁ କ୍ରିଷ୍ଟନ୍ ତାମୁଣ୍ ମାଡ୍ତଣ୍, ବେନ କି ମୁନେଡ୍ ମଣ୍ଟୁଲିତେ ଅର୍ଡ୍ତଣ୍ ନେତାଲ୍ ନୁ ଜିରୁସାଲେମ୍ ସବାତେ ସବ୍ୟ ମାଡ୍ତଣ୍ ପ୍ରେରିତ ୧୫:୧୩ । ପ୍ରେରିତ ପାଉଲ୍ ଗାଲା ଯାକୁବଙ୍କ ମଣ୍ଟୁଲିତେ ଦିମା ଇଞ୍ଜ କାର୍ଜାତଡ୍, ଗାଲାତୀୟ ୨:୯ । ଯାକୁବ ବଇ ଜିସୁ କ୍ରିଷ୍ଟ ଜନମତେ ପାଚାଗ୍ ଏଣ୍ଟକ୍ ପେକେ ଲେକାଆଡ୍ତେ ଇଞ୍ଜ ବାଇବଲ୍ ପଣ୍ଡିତ୍ ବିଶ୍ବାସ୍ ମାଡ୍ତଣ୍ । ଯାକୁବ ଜିରୁସାଲେମ୍ତେ ମଣ୍ଟୁଲି ନେତାଲ୍ ମାଡ୍ତଣ୍ ଆଦିଙ୍କ୍ ସମ୍ବାବନ୍ ଆଗେ ବାସେ ମାଡ୍ତମାନ୍ ଝେଲେ ଅଣ୍ଟାୟ ଇଦ୍ ବଇ ଲେକିମାଡ୍ତଣ୍ । ଯାକୁବ ଦେଶ୍ତାଗ୍ ଝେରେ ଝେରେ ଆସ୍ମାନ୍ ବାରତାନ୍ ଗୋଷ୍ଠୀକିଙ୍କ୍ ତାନ୍ ବଇତାଗ୍ ପରିଚୟ ଇସ୍ ମିନ୍ଦେଣ୍ ୧:୧ ।

ଆଦ୍ପାର୍ଦ୍ତେ ବ୍ୟବହାର୍ ଯୋଗ୍ୟ ବିଷୟ୍ ସାରେ କ୍ରିଷ୍ଟିୟାନ୍ ନାରୁଡ୍ ସେଙ୍ଗେ ଆଡ୍ତେ, କିନ୍ତୁ ବାରତାନ୍ ଗୋଷ୍ଠୀ ବିଷୟ୍ତେ ବ୍ୟବହାର୍ ମାଡ୍ତମାନ୍ ଶବ୍ଦ ସମ୍ବାବନ୍ ଯାକୁବ ସିଦା ଯିହୁଦୀ କ୍ରିଷ୍ଟିୟାନ୍ ନାରୁଡ୍କିଙ୍କ୍ ଲେକିମାଡ୍ତଣ୍ । ବାତେଙ୍କ୍ ଇଡ୍କେ ଇଦ୍ ବଇ ଏକାମ୍ ମାନ୍ କାର୍ତାନଡ୍କିଙ୍କ୍ ଏଞ୍ଜୁସାନ୍ ବିଷୟ୍ତେ ଟିକଣା ଇଦ୍ତେ । ଯାକୁବ, ବିଶ୍ବାସ୍ ନୁ ପାଡ୍ତ୍ରିତାଦ୍ ଗାଟି ସମ୍ପର୍କ ପର ତହସ୍ କେତିତଣ୍ ଯେ ପ୍ରକୃତ ବିଶ୍ବାସ୍ ପାଡ୍ତ୍ରିତାଗ୍ ତଅନ୍ଦିତ ୨:୧୭ । ଅଣ୍ଟାୟାକ୍ ନାରୁଡ୍ ସେଙ୍ଗେ ପକ୍ଷପାତ୍ ବିଷୟ୍ତେ ସତର୍କ ମାଡ୍ତଣ୍, ୨:୧-୪ । ସଞ୍ଜତ ମାଞ୍ଜ ଗତିତ୍ରିୟାନ୍ ବିଷୟ୍ତେ ଗାଲା ସତର୍କ ଆଦାନଙ୍କ୍ କେତିତଣ୍ । ୩:୧-୧୨

ବଇତ୍ ଲୋପେ ମାନ୍ ମୁକ୍ୟ ବିଷୟ୍

୧. ଯାକୁବ ତାମ୍ କାର୍ତାନଡ୍କିଙ୍କ୍ ଅବିବାଦନ୍ କେତିତଣ୍ । ୧:୧

୨. ଅଣ୍ଟା କ୍ରିଷ୍ଣିୟାନ୍ ନାରୁଡ଼କିଙ୍କ ଦୁଃକାମ୍ଭେଲେ ଗାଡ଼ସ୍ ମାନ୍ଦାନଙ୍କ
ସାହାସ୍ ଇଦତଣ୍ଟ । ୧:୨-୨୭
୩. ପାଡ଼ିତତ୍ତ୍ୱେଲା ବିଶ୍ୱାସ୍ ତଅତାନ୍ ଦରକାର୍ ଆଦ୍ ବିଷୟତେ
କେତିତଣ୍ଟ । ୨:୧-୨୬
୪. ବାକ୍ୟ ବେଲା ଶକ୍ତି ଆଦତେ ଆଦ୍ ଅଣ୍ଟା ଲେକ୍ତଣ୍ଟ । ୩:୧-୧୨
୫. ଯାକୁବ ଇଶ୍ୱରତେ ଜ୍ଞାନ୍ ଜାଗତିକ୍ ଜ୍ଞାନତାଗାଙ୍କ୍ ଖେରେ
ଆଦପାର୍ତେ ଆଦ୍ ବର୍ଣ୍ଣନା ମାଡ଼ିତଣ୍ଟ । ୩:୧୩-୪:୧୦
୬. ପେକେ ଅଣ୍ଟା କାରତାନଡ଼କିଙ୍କ ଗର୍ବ ମାଡ଼ିମାଟ୍ ଇଞ୍ଜ ସତର୍କ
ମାଡ଼ିତଣ୍ଟ । ୪:୧୧-୫:୬
୭. ମାଡେଙ୍ଗ୍ ଯାକୁବ ବେସ୍‌କେ ସାଦାରନ୍ ନିର୍ଦ୍ଦେଶନା ଇସ୍ ତାନ୍
ଲେକା ତେସ୍‌ଟଣ୍ଟ । ୫:୭-୨୦

୧ *ଇଶ୍ୱର ନୁ ପ୍ରଭୁ ଜିସୁ କ୍ରିଷ୍ଟନ୍ ଦାସ ଯାକୁବନ୍ ଖେଏକ୍ ଖେଏକ୍
ଆଡତେ ଇଶ୍ୱରତେ ନାରୁଡ଼କିଙ୍କ ନମସ୍କାର ।

ବିଶ୍ୱାସ୍ ନୁ ବୁଦ୍

୨ ହୋ ନା ଦାଦାଲଡ଼ି ନୁ ଏଲାସ୍, ମିଡ୍, ବେସ୍‌ଟ୍ ନାରଗେ
ପରିକ୍ଷାତାଗ୍ ପରିକ୍ଷା ଇଦତିଡ୍, ଆସୁଟେ ଆଦ୍ ଖେଡ଼କେଡ୍ ବିଷୟ
ଇଞ୍ଜ ଏକା ମାଡ଼ାଟ୍;

୩ ପରିକ୍ଷା ଇଡତେ ବିଶ୍ୱାସ୍ ଇ ଶକ୍ତିତଡ୍ ମାଡ଼ିଡ୍, ଇଦ୍ ତ ପୁଡ଼ତିଡ୍,
।

୪ ମେଣ୍ଟେ, ମିଡ୍, ବେଲାକି ବାଡ୍ ଗାଲା ବିଷୟତାଗ୍ କମ୍ ଆୟୟକଟ
ସାୟେ ନୁ ସାରେ ମାଡ଼ିତିଡ୍, ଆଦିନ୍ ସେଙ୍ଗେ ଶକ୍ତିତଡ୍ ପାଡ଼ିଦିଙ୍କ୍
ସାରେ ମାଡ଼ିତିଡ୍ ।

୫ ଇଡକେ ମିଇ ଲୋପେଙ୍କ୍ ବେସ୍‌ଟ୍ ବେନ ବୁଦ୍ ଅବାବ୍ ଆଡକେ,
ଆସୁଟେ ବେନ୍ ଇଶ୍ୱର ଦସ୍ ପୟକଟ କମ୍‌ଟି ଆୟକଟ୍ କାୟଦେ
ସାରେତଡ଼କିଙ୍କ୍ ଇଦତଣ୍ଟ, ଅନ୍ ମୁନ୍‌ନେ ଅଣ୍ଟା ପ୍ରାର୍ଥନା ମାଡ଼ିଣ୍ଟ,
ଆସୁଟେ ଅଂକିଙ୍କ୍ ଇଦତଡ୍ ।

☆ ୧:୧ ମାଡିଉ ୧୩:୫୫; ମାର୍କ ୭:୩; ପ୍ରେରିତ ୧୫:୧୩; ଗାଲାତୀୟ ୧:୧୯.

୬ ବାତେଙ୍କ ଇକେ ଅଣ୍ଟ ଆଦତେ କି ଆୟ ଇଞ୍ଜ ଏକା ମାଡକର୍ ପ୍ରାର୍ଥନା ମାଡାଟ୍, ଆଦ ରକମ୍ ନାରୁଣ୍ଟ, ଅଣ୍ଟ ଗାଆଲ୍ଦ ଚାଲେମ୍ ଆଦାନ ସମୁଦ୍ରତେ ତଲ୍ଲକଡ୍ ଲେକାମ୍ ।

୭ ଆଦ ରକମ୍ ନାରୁଡ୍ ପ୍ରବୁନାଗାଙ୍କ ବାଡ୍ ପାଏମ୍ ଆଦତନ୍ ଇଞ୍ଜ ଆଲ୍ସମାକିଣ୍ଟ;

୮ ଅଣ୍ଟ ତ ରେଣ୍ଟ ମନ୍ଦେ ନାରୁଡ୍, ନିଜେତାଦ୍ ସାରରେ ବିଷୟତାଗ୍ ଇକ୍ ଚିଟିକେ ଆଦତଣ୍ ।

ଗରିବ୍ ନୁ ସାଉକାର୍

୯ ଗରିବ୍ତେ ମାନ୍ଦାନ୍ କ୍ରିଷ୍ଟିୟାନ୍ ନାରୁଡ୍ ଉନ୍ନତି ଆକେ ଝେଡ୍‌କେ ଆୟିଣ୍ଟ,

୧୦ ସାଉକାର୍ କ୍ରିଷ୍ଟିୟାନ୍ ବିଶ୍ୱାସି ନିଜେ ଗରିବ୍ ଆଦାନଙ୍କ ଆଲ୍ସିଣ୍ଟ, ବାତେଙ୍କଈକେ ଅଣ୍ଟ ଗାଡ୍‌ତେ ପୁଙ୍ଗାର୍ ଲେକାମ୍ ଦୁଲ୍ଲିତଣ୍ ।

୧୧ ପଡ୍‌ଦ୍ କାମକେତେ ପେୟକେ, ଗାଡ୍ ବେଲା ଝାସି ଆଦତେ ନୁ ତାନ୍ ପୁଙ୍ଗାର୍ ଦୁଲ୍ଲି ରାଲିଡ୍ ମେଣ୍ଟେ ତାନାଦ୍ ସୁନ୍ଦର୍ ମାୟି ଆଦତେ, ଆଦେରକମ୍ ସାଉକାର୍ ନାରୁଡ୍, ତାନ୍ ସାରରେ ବିଷୟତାଗ୍ ଝାସି ଆଦତନ୍ ।

ପରିକ୍ଷା ନୁ ଲବ୍

୧୨ ବେନ ନାରୁଣ୍ଟ ପରିକ୍ଷାତାଗ୍ ଜିଡିତଣ୍ଟ, ଅଣ୍ଟ ବାଗ୍ୟବାନ୍, ବାତେଙ୍କଈକେ ପ୍ରବୁ ତାନ୍ ପ୍ରିୟ ନାରୁଡ୍‌କ୍ ବେନ୍ ଜିଝେତାଦ୍ ସହଜ୍ ଇଦାନଙ୍କ୍ ଗର୍ ଇଡ୍‌ତନ୍, ପରିକ୍ଷା ଇଡ୍‌ତେ ପେରକେ ଆ ନାରୁଡ୍, ଜିଝେତାଦ୍ ସାୟେ ପ୍ରେମତେ ସହଜ୍ ପାଏମ୍ ଆଦତନ୍ ।

୧୩ ବେନଙ୍କ୍ ପରିକ୍ଷା ଆଡ୍‌କେ, ଅଣ୍ଟ ଇଦ୍ ପରିକ୍ଷା ଇଶ୍ୱରତାଗାଙ୍କ୍ ଆଦୁଡ୍‌ତେ ଇଞ୍ଜ କେଲ୍‌ମାଟ୍, ବାତେଙ୍କଈକେ ଇଶ୍ୱର କାରାପ୍‌ତାଗ୍ ପରିକ୍ଷା ଆୟିଣ୍ଟ, ମେଣ୍ଟେ ଅଣ୍ଟ ନିଜେ ବେନଙ୍କ୍ ପରିକ୍ଷା ମାଡ୍‌ଣ୍ ।

୧୪ ଇଡ୍‌କେ ସାରରେ ନାରୁଡ୍, ନିଜେଡ୍ କାରାପ୍ ପାଡ୍‌ୟି ଆଲ୍ସି ନୁ କାରାପ୍ ଚିନ୍ତେ ମାଡି ପରିକ୍ଷା ଆଦତନ୍;

୧୫ ତାନ୍ ପେରକେ କାରାପ୍ କାମ୍‌ତେ ତଙ୍କେଡ୍ ଆସ୍ ପାପତିଙ୍କ୍ ଜନମ୍ ମାଡିଡ୍, ମେଣ୍ଟେ ପାପ୍ ସାରେ ପେରସି ତଲାନାଦିଙ୍କ୍ ଜନମ୍ ଇଦ୍‌ତେ ।

୧୬ ହୋ ନା ପ୍ରିୟ ଦାଦାଲଡି ନୁ ଏଲାୟ୍, ମିଡ୍ ଦାନ୍ଦେ ଆୟମାଟ୍ ।

୧୭ ସାରରେ ସାୟେଡ଼ ଦାନ ନୁ ସାରରେ ସାୟେଡ଼ ଉପହାର ସ୍ୱର୍ଗତେ ବାବାନାଗାଙ୍କୁ ଖାଦତେ, ଅଣ୍ଟ ସାରେ ଖେସ୍ତେ ମାଦିନ୍ କର୍ତ୍ତାଲ୍ । ଅନ୍ ଖେରେନାରୁଡ଼୍ ଲେକାମ୍ ଆୟନ୍; ମାବ୍ ନିଡ଼କେ ମାଡ଼ି ବେସୁଙ୍କୁ ଇକାଡ଼୍ ସୃଷ୍ଟି ମାଡ଼ଣ୍ ।

୧୮ ମାନାଡ଼୍ ବେଲା ଅନ୍ ନିଜାମ୍ ସଡ଼୍ ତିୟାର୍ ମାଡ଼ତେ ଜିଝାକ୍ ଲୋପେଙ୍କୁ ଅଣ୍ଟୟ୍ ମୁନେନ୍ ଆଦତେ କାୟେ ରକମ୍ ଆଦତାଡ଼୍, ଆଦିନ୍ ସେଙ୍ଗେ ଅଣ୍ଟ ତାନ୍ ଇଚ୍ଛାତେ ନିଜାତେ ଗର୍ ତଡ଼୍, ମାନାଙ୍କୁ ସୃଷ୍ଟି ଇଡ଼ତନ୍ ।

କେଞ୍ଜିତାଡ଼୍ ନୁ ପାଡ଼ୟି ମାଡ଼ିତାଡ଼୍

୧୯ ହୋ ନା ପ୍ରିୟ ଦାଦାଲଡ଼ି ନୁ ଏଲାସ୍, ମିଡ଼୍ ଇଦ୍ ପୁଡ଼ତିଡ଼୍ । ସାରରେ ନାରୁଡ଼୍ କେଞ୍ଜାନଙ୍କୁ ସିର୍ପାଟ୍ ଆୟମୁଟ୍, କେତାନାଗ୍ ଜାମ୍, ମେଣ୍ଟେ କପାମ୍ ଆଦାନଙ୍କୁ ଜାମ୍ ଆୟିଣ୍,

୨୦ ବାତେଙ୍କୁଇକେ ନାରୁଡ଼ାଦ୍ କପାମ୍ ଇଶ୍ୱରତେ ଇଚ୍ଛା ଦାର୍ମାମ୍ କାମ୍ ମାଡ଼ାନଙ୍କୁ ପାର୍ଝ ।

୨୧ ଆଦିଙ୍କୁ ମିଡ଼୍ ସାରରେ କାରାପ୍ ବିଷୟ ନୁ ସାରରେ କାରାପ୍ ପାଡ଼ୟି ଝିଡ଼ସି, ଇଶ୍ୱରତେ ପାକେ ନିଜେତିଙ୍କୁ ସମର୍ପଣ ମାଡ଼ାଟ୍ ନୁ ମୀଇ ହୃଦୟତାଗ୍ ଅଣ୍ଟ ବେନା ବାକ୍ୟ ଉରସ୍ତାଡ଼୍ ନୁ ବାଡ଼ ମିକିଙ୍କୁ ରକ୍ଷା ମାଡ଼ାନଙ୍କୁ ପାର୍ଡତନ୍, ଆଦ୍ ଗ୍ରହନ୍ ମାଡ଼ାଟ୍ ।

୨୨ ବାତେଙ୍କୁଇକେ ଆସାମ୍ କେଞ୍ଜି ନିଜେ ନିଜେତିଙ୍କୁ ବୁସା ମାଡ଼୍ଝେ କଞ୍ଚ ବାକ୍ୟତାଦ୍ ପାଡ଼ୟି ମାଡ଼ାଟ୍ ।

୨୩ ବାତେଙ୍କୁଇକେ ଯଦି ବେନ ବାକ୍ୟତାଦ୍ ପାଡ଼ୟି ମାଡ଼୍ଝେ କନ୍ସ୍ ଆସାମ୍ କେଞ୍ଜିତଣ୍, ଅଣ୍ଟ ଦର୍ପନ୍ତାଗ୍ ନିଜେଡ଼ ମକମ୍ ଉଡ଼ାନ୍ ନାରୁନ୍ ଲେକାମ୍,

୨୪ ଆଦିଙ୍କୁ ଅଣ୍ଟ ନିଜେତିଙ୍କୁ ଉଡ଼ି ଆଡ଼ତେ ପେରକେ, ଅଣ୍ଟ ବେସଡ଼ ନାରୁଡ଼୍, ଆଦ୍ ଆସୁଟେ ମାଙ୍ଗ୍ ତଣ୍ ।

୨୫ ଇଡ଼କେ ବେନ ନିଜାମ୍, ସ୍ୱାଦିନ୍ତାଦ୍ ନିୟମ୍ତିଙ୍କୁ ଉଡ଼ି ଅଦିନ୍ତଡ଼୍ ଗାଡ଼ସ୍ ମାନ୍ତଣ୍, ମେଣ୍ଟେ ବିସ୍ମରଣତ୍ ଲେକାମ୍ ଆୟକର୍ ବରଂ କାମ୍ ମାଡ଼ାନଣ୍ ଆଦତନ୍, ଅଣ୍ଟ ତାନ୍ ପାଡ଼ୟିତାଗ୍ ଦନ୍ୟ ।

୨୭ ଯଦି ବେନ ନିଜେତିଙ୍କ ଦାର୍ମାମ୍ ନାରୁଡ଼୍ ଇଞ୍ଜ ଏକା ମାଡ଼ି, ମେଣ୍ଡେ ନିଜେଡ଼ ଖାଞ୍ଜେରତିଙ୍କ ଆୟଡ଼ ମାଡ଼ାନଙ୍କ ପାରୁଝ କନ୍‌ସ୍ ନିଜେଡ଼ ଜିଝୁଣ୍ଡିଙ୍କ ଦଷ୍ଟ ମାଡ଼ିତନ୍, ଅନ୍‌ଝାଦ୍ ଦାର୍ମାମ୍ ସାରେ ଆସାମ୍ ।

୨୮ ବେନ୍ ଦାର୍ମାମ୍ କାର୍ମାମ୍ ବାବାଲ୍ ଇଶ୍ବରତେ କଣ୍ଡେତେ ବିଶୁଦ୍ ନୁ ଉତାର୍ଡ, ଆଦ୍ ଅଦୁଡ଼ ଦୁର୍ଦ୍‌ଶା ଲେକାମ୍ ଅନର୍ଡ ନୁ ରାଣ୍ଡିକିନ୍ ଯତନ୍ ଆଦାନ୍ ସେଙ୍ଗେ ଜଗଡ଼ କଷ୍ଟ ତାଗାଙ୍କ ନିଜେତିଙ୍କ ମୁକ୍ତ ନେହେତିକାଡ଼୍ ।

୨

କାରାପ୍ ବିଚାର

୧ ଆ ନା ଦାଦାଲଡ଼ି ନୁ ଏଲ୍‌ୟାସ୍, ମାନ୍ ଗୌରବତଣ୍ ପ୍ରବୁ ଜିସୁ କ୍ରିଷ୍ଟନାଗ୍ ବିଶ୍ବାସ୍ ମାଡ଼ିମାନାଙ୍କ ନାରୁଡ଼୍‌କିଙ୍କ ଆଦଲେକାମ୍ କେଲ୍‌ମାଟ୍ ।

୨ ବାଡେଙ୍କିକେ ସୁନାତାଦ୍ ମୁଦ୍ ନୁ ସାୟେଡ଼ ଚକେ କେରସ୍ ବେନ ମିୟାଦ୍ ମିଟିଙ୍ଗ୍‌ତାଗ୍ ଖାଦ୍‌ତଣ୍ଡ, ମେଣ୍ଡେ ଝେରଣ୍ ଗରିବ୍ ନାରୁଡ଼୍ ମୁକ୍ ଥାଡ଼ତାଦ୍ ଚକେ କେରସ୍ ଖାଦ୍‌ତଣ୍ଡ,

୩ ମେଣ୍ଡେ ମିଡ଼୍ ସାୟେଡ଼ ଚକେ କେରଡେନଙ୍କ କେଡିଡିଡ଼୍, ଇଗେ ସାୟେଡ଼ ପଡ଼୍‌ୟେତାଗ୍ କୁଦ୍‌ଦା, ମେଣ୍ଡେ ଗରିବ୍ ନାରୁଙ୍କ କେଲ୍‌ମାଟ୍, ଆଗେ ନିଲ୍‌ମ୍, ବା ନେଲ୍ କୁଦେ ।

୪ ଆଲେକେ ମିଡ଼୍ ବାଡ଼ ନିଜେଡ଼ ନିଜେଡ଼ ଲୋପେ ଝେଏକ୍ ଆସ୍ ମେଣ୍ଡନ୍ ରକମ୍ ବ୍ୟବହାର୍ ନୁ କାରାପ୍ ବିଚାର୍ ମାଡ଼ୁଡ଼ିଡ଼୍ ?

୫ ଆ ନା ଦାଦାଲଡ଼ି ନୁ ଏଲ୍‌ୟାସ୍, କେଞ୍ଜାର୍, ଇଶ୍ବର ବାଡ଼ ଇଦ୍ ଜଗଡ଼ତେ ଗରିବ୍ ନାରୁଡ଼୍‌କିଙ୍କ ବିଶ୍ବାସ୍‌ତାଦ୍ ଦନ୍‌ତାଗ୍ ସାଉକାର୍ ଆଦାନଙ୍କ, ମେଣ୍ଡେ ନିଜେ ପ୍ରେମ୍ ମାଡ଼ାନକିଙ୍କ ବେନ୍ ରାଜ୍ୟ ଇଦାନଙ୍କ ଗପଡ଼ ମାଡ଼ତଣ୍ଡ, ଆଗେଡ଼ ଅଦିକାରି ଆଦାନଙ୍କ ଏଞ୍ଚଣ୍ଡ କି ?

୬ ଇଡ଼କେ ମିଡ଼୍ ଗରିବ୍ ନାରୁଡ଼୍‌କିଙ୍କ ପାୟୁଡିଡ଼୍ । ସାଉକାର୍ ନାରୁଡ଼୍ ବାଡ଼ ମିଇ ପରର ଅତ୍ୟାଚାର୍ ମାଡ଼ଡ଼୍ କି ମେଣ୍ଡେ ମିକିଙ୍କ ବିଚାର୍ ମାଡ଼ାନାଗ୍ ଲାଗି ଆୟୁଝିଡ଼୍ କି ?

୭ ବେନ୍ ଜିସୁକ୍ରିଷ୍ଟନ୍ ପେଦେର୍ଡେ ମିଡ଼୍ ପାଏମ୍ ଆଡ଼ଡିଡ଼୍, ଆଦ୍ ପେଦେର୍ଡେତେ ବାଡ଼ ଅଡ଼୍‌ନିନ୍ ମାଡ଼ଡ଼୍ ?

୮ ମିଡ଼, ମିଇ ଗାରେତଡ଼କିଂଙ୍କ ଜିଝୁତଡ଼ ପ୍ରେମ ମାଡ଼ାଟ୍, ଶାସ୍ତ୍ରତାଗ ଇଦ୍ ଇଶ୍ବରତେ ନିୟମ୍ ଯଦି ନିଜାମ୍ ପାଲନ୍ ମାଡ଼କେ, ଆଲେକେ ସାୟେଡ଼ କାମ୍ ମାଡ଼ତିଡ଼,

୯ ଯଦି ନାରୁଡ଼କ୍ ପକ୍ଷପାତ ବ୍ୟବହାର ମାଡ଼ୁଡ଼ିଡ଼, ଆଲେକେ ମିଡ଼, ପାପ୍ ମାଡ଼ୁଡ଼ିଡ଼, ମେଣ୍ଡେ ଇଦ୍ ମୋଶାନ୍ ନିୟମ୍ ଲେକାମ୍ ଦକ୍ଷି ଆଦତିଡ଼ ।

୧୦ ବାତେଙ୍କଇକ୍ଟେ ବେନ ସାରରେ ନିୟମ୍ ପାଲନ୍ ମାଡ଼ି ଅଣ୍ଡୟ ନିୟମ୍ତିଙ୍କ ପାଲନ୍ ମାଡ଼ନ୍, ଆଲେକେ ଅଣ୍ଡ ଆଦ୍ ସାରରେ ନିୟମ୍ତିଙ୍କ ପାଲନ୍ ମାଡ଼ଣ୍ ଇଞ୍ଜ ଦଣ୍ଡ ପାଏମ୍ ଆଦତନ୍ ।

୧୧ ଆଦିଙ୍କ ବେନ ଇଶ୍ବର ବେବିଚାର ମାଡ଼ମାର୍ ଇଞ୍ଜ କେସମାଡ଼ତଣ୍ଡ, ଅଣ୍ଡ ଗାଲା ଆଞ୍ଜୁକ୍ମାର୍ ଇଞ୍ଜ କେସମାଡ଼ତଣ୍ଡ, ଆଦିଙ୍କ ମିଡ଼, ଯଦି ବେବିଚାର ମାଡ଼କଟ୍ ନାରୁଡ଼କ୍ ଆଞ୍ଜୁକିଡ଼ିଡ଼, ଆଲେକେ ନିୟମ୍ତିଙ୍କ ପାଲନ୍ ମାଡ଼ୁଡ଼ିଡ଼ ।

୧୨ ବେନ୍ ସ୍ବାଦିନତେ ନିୟମ୍ ତଡ଼୍ ମିଡ଼୍ ଯେ ବିଚାର ଆଦତିଡ଼, ଇଦ୍ ପୁଞ୍ଜ ଆଦେରକମ୍ କେଲାଟ୍ ନୁ ପାଡ଼୍ଯି ମାଡ଼ାଟ୍ ।

୧୩ ବାତେଙ୍କଇକ୍ଟେ ବେନ ଖେରେ ତଡ଼କିଙ୍କ ଦୟା ମାଡ଼ଣ୍ଡ, ବିଚାର ସମୟତେ ଇଶ୍ବର ଅଡ଼କିଂଙ୍କ ଦୟା ତଡ଼ିତନ୍ ।

ବିଶ୍ବାସ ନୁ ପାଡ଼୍ଯି

୧୪ ଆ ନା ଦାଦାଲଡ଼ି ନୁ ଏଲାସ୍, ଯଦି ବେନ ନାୟାଦ୍ ବିଶ୍ବାସ୍ ମିୟେ ଇଞ୍ଜ କେଡିତଣ୍ଡ, ଇଡ଼କେ ଅନ୍ ପାଡ଼୍ଯି ଇଲ୍ଖେମାନ୍ତେ, ଆଲେକେ ଆଦ୍ ବାଡ଼ ଲାବ୍ ? ଇଦ୍ ରକମ୍ ବିଶ୍ବାସ୍ ବାଡ଼ ବେନଙ୍କ ମୁକ୍ତି ଇଦ୍ ପାର୍ଦଦେ କି ?

୧୫ ହେକେ ମାଡ଼ାଟ୍ ଯଦି ବେନ ତାମୁଣ୍ଡ ଆୟି ବା ଏଲାଡ଼୍ ଆୟି, ତକାସିଲେ ନୁ ତିୟାନାଦ୍ କାଦି ଦରକ,

୧୬ ଇଶ୍ବର ମିକିଙ୍କ ଆର୍ଗି ବାଦ୍ ମାଡ଼ିଡ଼ ତିଞ୍ଜ ଉଞ୍ଜ ଶାନ୍ତିତେ ମାନୁଟ୍ ନିଯାଡ଼ ଗଟ୍ ଆଙ୍ଗଡ଼ାମ୍ ଆୟିକି ?

୧୭ ଆଦେ ରକମ୍ ବିଶ୍ବାସ୍ ନୁ ପାଡ଼୍ଯି ଇଲକଟ୍ ମାଡ଼କେ ବିଶ୍ବାସ୍ ତଲ୍ତେ ।

୧୮ ଇଡ଼କେ ବେନ ବା କେଡିତଣ୍ଡ, ଖେରନାଦ୍ ବିଶ୍ବାସ୍ ମିୟେ, ମେଣ୍ଡେ ଅର୍ଥ ନାଦ୍ ପାଡ଼୍ଯି ମିୟେ, କିନ୍ତୁ ନୁାନେ କେତୁତାନ୍ ପାଡ଼୍ଯି

ଓଡ଼ିସି ମିୟାଦ ବିଶ୍ୱାସ ନାକିଂଙ୍କ ତଅମ୍, ମେଣ୍ଡେ ନାନ୍ ପାଡ଼ିତଡ଼,
ନିକିଂଙ୍କ ମିକିଂଙ୍କ ନାୟାଦ ବିଶ୍ୱାସ ତଅତିତାନ୍ ।

^{୧୯} ଇଶ୍ୱର ଯେ ଝେରଣ୍, ଇଦ୍ ମିଡ଼୍ ବିଶ୍ୱାସ ମାଡ଼ିତୁଡ଼; ସାୟେଡ଼
ଗଟ୍, ବୁଡ଼କ୍ ଗାଲା ବିଶ୍ୱାସ ମାଡ଼ି ଝେରଦେ ଝାଡ଼କିତା ।

^{୨୦} ଇଡ଼କେ ଆ ମୁର୍କ୍ ନାରୁଡ଼ି, ପାଡ଼ିତ ଓଡ଼ିସି ବିଶ୍ୱାସ ବାଡେଏ ବା
ଆୟୁୟ, ଇଦ୍ ବାଡ଼ ପୁନ୍ଓଡ଼ି?

^{୨୧} ମାନ୍ ମୁନେଡ଼ ବାବାଲ୍ ଅବ୍ରାହାମ୍ ବେଦି ପରର ନିଜେଡ଼ ମାର୍
ଇସ୍ରାକ୍ତିଙ୍କ ବଳି ମାଡ଼ାନ୍ ଝେଲେ ବାଡ଼ ପାଡ଼ିତଡ଼ ଦାର୍ମାମ୍ ଆସ
ମାନଣ୍ ?

^{୨୨} ମିଡ଼୍ ଉଡ଼ିତୁଡ଼ ଯେ ବିଶ୍ୱାସ ଅନ୍ ତଡ଼ ମାଡ଼ତେ, ମେଣ୍ଡେ ଆଦ୍
ପାଡ଼ିତଡ଼ ବିଶ୍ୱାସ ନିଜାମ୍ ଆଡ଼ତେ;

^{୨୩} ଆଗାଙ୍କ ଶାସ୍ତ୍ରତାଗ୍ ଇଦ୍ ଲେକ୍ତେ ବାକ୍ୟ ସାରେ ଆଡ଼ତେ,
ଅବ୍ରାହାମ୍ ଇଶ୍ୱରତାଗ୍ ବିଶ୍ୱାସ ମାଡ଼ତଣ୍, ମେଣ୍ଡେ ଆଦ୍ ଅଂକିଙ୍କ
ଦାର୍ମାମ୍ ମାଡ଼ତେ, ମେଣ୍ଡେ ଅଣ୍ ଇଶ୍ୱରତେ ସାଙ୍ଗ୍ ଇଞ୍ଜ ପେଦେଡ଼
ଆଡ଼ତେ ।

^{୨୪} ଆସାମ୍ ବିଶ୍ୱାସ ମାଡ଼କେ ଯେ ଦାର୍ମାମ୍ ଆୟୁୟଣ୍ ପାଡ଼ି
ମାଡ଼କେ ଦାର୍ମାମ୍ ଆଦତନ୍, ଇଦ୍ ମିଡ଼୍ ଉଡ଼ିତୁଡ଼ ।

^{୨୫} ଆଦେ ରକମ୍ ଦାରି ରାହାବ ଦୂଡ଼କିଂଙ୍କ ନିଜେଡ଼ ମାଡ଼ି ମେଣ୍ଡେ
ଅଣ୍ ହାର ଇସ୍ ଆଞ୍ଜିଙ୍କ ରହସିଡ଼ତାଙ୍କ ବାଡ଼ ପାଡ଼ିତଡ଼ ଦାର୍ମାମ୍
ଆୟୁୟଣ୍ ?

^{୨୬} ବାଡେଙ୍କିଡ଼କେ ଆମ୍ ଓଡ଼ିସି ବେଲା ମେୟୁଲ୍ ତଲିଡ଼, ଆଦେ
ରକମ୍ ପାଡ଼ିତ ଓଡ଼ିସି ବିଶ୍ୱାସ ତଲିଡ଼ ।

୩

ଝାଞ୍ଜେର

^୧ ଆ ନା ଦାଦାଲଡ଼ି ନୁ ଏଲାୟ୍, ମିଡ଼୍ ନାର୍ଗେ ମେସ୍ତେରିଡ଼,
ଆୟୁମାଟ୍; ମେସ୍ତେରି ଯେ ମାନାଡ଼, ମାନାଡ଼ ନାର୍ଗେ ଦଣ୍ ପାଏମ୍
ଆଦତାଡ଼, ଇଦ୍ ପୁଞ୍ଜମାନୁଟ୍ ।

୨ ଆଦିଙ୍କ ମାନାଡ଼ ନାରଗେ ବିଷୟତାଗ୍ ମଦଲ୍ ଆଦତାଡ଼ । ଯଦି ବେନ ବାକ୍ୟତାଗ୍ ମଦଲ୍ ଆନଣ୍ଡ, ଆଲେକେ ଅଣ୍ଡ ନିଜାତେ ନାରୁଡ଼, ସାରରେ ମେନ୍ଦୁଲ୍‌ତିଙ୍କ୍ ଗାଲା ନିଜେଡ଼ ଆଦିନ୍ ମାଡେ ପାର୍‌ଦତ୍ତ ।

୩ ମାନାଡ଼ ଗୁରାକିଂଙ୍କ ନିଜେଡ଼ ଆଦିନ୍ ମାଡାନ ସେଙ୍ଗେ ଆ ପାୟୁରତାଗ୍ ଲଗାମ୍ ଇଡକେ, ତାନ୍ ପେରକେ ଆସ୍ତୁ ସାରରେ ମେନ୍ଦୁଲ୍‌ତିଙ୍କ୍ ଗାଲା ଉଡସ୍ତ ପାରତାଡ଼ ।

୪ ଉଡାଟ୍, ଏର୍ ଜାହାଜ୍ ଇସର୍ ବାଡ଼ୟାଦ୍ ଆସ୍ ଗାଟି ଗାଲ୍ ତଡ଼, ଆଡକେ ଗାଲା ଅଣ୍ଡୟ ସୁଦୁରାଦ୍ ମଙ୍ଗ* କଅତାନ୍ ଉକୁଡ଼, ତଡ଼, ଉକୁଡ଼ତିଙ୍କ୍ ପୟ୍‌ତେନଣ୍ଡତେ ଇଚ୍ଛାତେ ଆଦତେ ।

୫ ଆଦେ ରକମ୍ ଖାଞ୍ଜେର୍ ଗାଲା ଅଣ୍ଡୟ ସୁଦୁରାଦ୍ ଆସ୍ତୁଙ୍ଗ, ଇଡକେ ବାଡ଼ୟା ଗଟି କେତିଡ଼ । ଉଡାଟ୍, ବେସର୍ ସୁଦୁର୍ କିସ୍ ତାଡ଼ମି ତଡ଼, ଗାଟି ବେଡ଼ୟାଦ୍ ଗୁପ୍‌ପେତାଗ୍ କିସ୍ ନିଡ଼ତିଡ଼ ।

୬ ଖାଞ୍ଜେର୍ ଗାଲା କିସ୍ ଲେକାମ୍; ନାଗେ କାରାପ୍ କାମ୍‌ଦେ ନିଣ୍ଡିମିନ୍ଦେ; ମେଣ୍ଡେ ଆଦ୍ ମାନ୍ ମେନ୍ଦୁଲ୍ ତାଗେ ମାନ୍‌ନାଙ୍କ୍ ଆସଡ଼ ପ୍ରବାବ ହେକାମ୍ ମାଡ଼ି ମାନାଦ୍ ସାରେ ବିଶ୍ୱାତିଙ୍କ୍ କଲୁଷିତ ମାଡ଼ିତେ । ଖାଞ୍ଜେର୍‌ତେ ନରକ କିସ୍ ମାନାଦ୍ ସାରେ ଜିଞ୍ଜେଡ଼ିଙ୍କ୍ ନିଡ଼ସ୍ତିଦେ ।

୭ ଇଡକେ ସାରରେ ଲେକାଡ଼ ଜିଞ୍ଜାକ୍, ପିଟେ, ଚିଟିକ ଆଦାନ୍ ଜାଞ୍ଜାକ୍ ନୁ ଏର୍‌ତାଗ୍ ମାନ୍‌ନା ଜିଞ୍ଜୁକିଂଙ୍କ୍ ନାରୁଡ଼, ତଡ଼, ଆଦିନ୍ ମାଡାନଙ୍କ୍ ଆଦତେ, ମେଣ୍ଡେ ଅଦିନ୍‌ତାଗ୍ ନେଃଏସ୍ ମିନ୍ଦେ;

୮ ଇଡକେ ଖାଞ୍ଜେର୍‌ତିଙ୍କ୍ ବେନ ଅଦିନ୍‌ତାଗ୍ ନେଃଏତାନଙ୍କ୍ ପାର୍‌ଖଣ୍ଡ, କାରାପ୍ ଗଟି କେତାନଙ୍କ୍ ଆଦ୍ ନିଡ଼ତ, ଗାଟି ବୟ୍‌ଲାର୍ ଝିସାମ୍ ତଡ଼, ଆଦ୍ ବଡ଼ ଆଡତେ ।

୯ ମାନାଡ଼ ଖାଞ୍ଜେର୍ ତଡ଼ ପ୍ରବୁ ନୁ ବାବାଙ୍କ୍ ଦନ୍‌ସବାଦ୍ ମାଡ଼ିତାଡ଼, ମେଣ୍ଡେ ଇଣ୍ଡର୍ ଲେକାମ୍ ତିୟାର୍ ଆଡତେ ନାରୁଡ଼କିଂଙ୍କ୍ ଅବିଶାପ୍ ଇଡତାଡ଼;

୧୦ ଅଣ୍ଡୟ ପାୟୁରତେ ଆଲା ଦନ୍‌ସବାଦ୍ ନୁ ଅବିଶାପ୍ ପେୟଡ଼ିଡ଼ । ଆ ନା ଦାଦାଲଡ଼ି ନୁ ଏଲାସ୍, ଇଦ୍ ରକମ୍ ଆଦାନାଦ୍ ଟିକ୍ ଆୟ୍‌ୟ ।

୧୧ ବେଡେମ୍ ବାଡ଼ ଅଣ୍ଡୟ ଦୟ୍ ଇସ୍ ମିଙ୍ଗତାଦ୍ ନୁ କାୟ୍‌ତାଦ୍ ରେଣ୍ଡ ଲେକାଡ଼ ଏର୍ ପେସ୍ତିଡ଼ ?

* ୩:୪ (ମଙ୍ଗ) ବାଡ଼ିୟାଦ୍ ଜାଜତିଙ୍କ୍ ଉଡସ୍ତାନାଦ୍ ବା ମାଲ୍‌ପାନାଦ୍ ହେଣ୍ଡେଲ୍, ଆଦିଙ୍କ୍ ମଙ୍ଗ ଇଞ୍ଜ କେତିଡ଼.

୧୨ ଆ ନା ଦାଦାଲଡ଼ି ନୁ ଏଲାସ୍, ତୟେ ମାଡେତାଗ୍ ବାଡ଼ ଜୀତ କାୟା ଆଦିତା, କି ଅଙ୍ଗୁର୍ ଟଣ୍ଡେତାଗ୍ ବାଡ଼ ତୟେ କାୟା ଆଦାନଙ୍କ ପାର୍ଦ୍ଦତେ ? ଅଞ୍ଜଡ଼୍ ବେଡେଡ଼୍ ମିକା ମିଙ୍ଗ୍ତାଦ୍ ଏର୍ ଇଦାନଙ୍କ ପାର୍ଦ୍ଦ

ସ୍ବର୍ଗତାଦ୍ ବୁଦ୍

୧୩ ମିଇ ଲୋପେ ଜାନି ନୁ ବୁଝିମାନ୍ ବେନ ମିନ୍ଦେଣ୍ଡ ? ଅଣ୍ଡ ତାନ୍ ବୁଦ୍ ତଡ଼୍ ସାୟେ ବ୍ୟବହାର୍ ମାଡ଼ି ନିଜେଡ଼୍ ପାଡ଼୍ଯି ମାଡ଼ିଣ୍ଡ ।

୧୪ ଇଡ଼କେ ଯଦି ମିଇ ଜିଞ୍ଜୁଣ୍ଡ ଲୋପେ ଗାଟି ଇର୍ଷା ମିନ୍ଦେ ନୁ ସ୍ବାର୍ତ୍ତପର ମିନ୍ଦେ, ଆଲେକେ ନିଜାମ୍ ବିରୁଦ୍ଦତେ ଗର୍ବ ମାଡ଼ମାଟ୍ ନୁ ମିଟ୍ କେଲ୍ମାଟ୍ ।

୧୫ ଇଦ୍ ରକମ୍ ବୁଦ୍ ଇଶ୍ବର କନ୍ସ୍ ଖାଡ଼, ମାତର୍ ଆଦ୍ ପୃତିବିତାଦ୍, ମେନ୍ଦୁଲ୍ତାଦ୍ ନୁ ବୁଡ଼ିକ ପାଡ଼୍ଯି;

୧୬ ବାତେଙ୍କଇକ୍ ବେନ୍ ପଡ଼୍ଯେତାଗ୍ ଆଙ୍କାର୍ ନୁ ସ୍ବାର୍ତ୍ତପର ମାନ୍ତେ, ଆଦ୍ ପଡ଼୍ଯେତାଗ୍ ବିଶୁକଲା ନୁ ସାରରେ ରକମ୍ କାରାପ୍ ପାଡ଼୍ଯି ମାନ୍ତେ ।

୧୭ ଇଡ଼କେ ପରର କନ୍ସ୍ ଖାଡ଼ତେ ବୁଦ୍ ପବିତ୍ର, ଶାନ୍ତି, ସାୟେ, ମାଡ଼ାଙ୍କ୍ ଖେୟତିଡ଼୍, ଦୟା ନୁ ଲେକେଡ଼୍ ଆସ୍ମାନ୍ତେ, ତାଞ୍ଜୁର୍ ଇଲ୍ଲେ ନୁ ଆଦ୍ ଚଲନା ଇଲ୍ଲେ ।

୧୮ ମେଣ୍ଡେ ଆଦ୍ ଶାନ୍ତି ଇଦାନ୍ ନାରୁଡ଼୍ ତଡ଼୍ ଦାର୍ମାମ୍ ଲେକାମ୍ କାୟେଡ଼୍ ପେଡେମ୍ ଓଡାନଙ୍କ ଆଦ୍ତେ ଦାର୍ମାମ୍ ଓଡେ କୟତିତଡ଼୍ ।

୪

ଇଶ୍ବରତଡ଼୍ ସାଙ୍ଗ

୧ ମିଇ ଲୋପେ ଗଲ୍ଲକ୍ ନୁ ଯୁଦ୍ ବେଗାକନ୍ସ୍ ଆଦୁଡ଼ତେ ? ବାଡ଼ ମିଡ଼୍ତେକା କାୟକିନ୍ ତଡ଼୍ ଯୁଦ୍ ମାଡ଼ମାନ୍ଦାନ୍ ଖାସ୍ତେ ଆଗେତାଗାଙ୍କ୍ ଆୟ୍ଯ ?

୨ ମିଡ଼୍ ଆସିତିଡ଼୍; ବାତେଙ୍କଇକ୍ ପାହେମ୍ ଆୟ୍ଡ଼ିଡ଼୍; ମିଡ଼୍ ଆଞ୍ଜୁକିତିଡ଼୍ ନୁ ଇର୍ଷା ମାଡ଼ିତିଡ଼୍, ଇକ୍ ପାହେମ୍ ଆୟ୍ଡ଼ିଡ଼୍; ମିଡ଼୍ ଗଲ୍ଲକ୍ ନୁ ଯୁଦ୍ ମାଡ଼ିତିଡ଼୍, ମିଡ଼୍ ପାହେମ୍ ଆୟ୍ଡ଼ିଡ଼୍, ବାତେଙ୍କଇକ୍ ମିଡ଼୍ ଇଶ୍ବରତିଙ୍କ୍ ତାଲ୍ଡ଼ିଡ଼୍ ।

୩ ମିଡ଼ ତାଆଲୁକ୍ତିଡ଼, ଇଡ଼କେ ମିକିଂଙ୍କ ଦରକ, ବାତେଙ୍କଇକେ ନିଜେଡ଼ ନିଜେଡ଼ ସୁକାମ୍‌ତେ ମାୟୁଦିଙ୍କ ବ୍ୟବହାର ମାଡ଼ାନ୍ ସେଙ୍ଗେ କାରାପ୍‌ ଚିନ୍ତେ ତଡ଼ ତାଆଲୁକ୍ତିଡ଼ ।

୪ ବିଶ୍ୱାସ୍‌ତିଙ୍କ ଉଠତାନଡ଼ି, ଜଗଡ଼ତିଙ୍କ ସାଙ୍ଗ ମାଡ଼କେ ଇଶ୍ୱରତେ ଶତ୍ରୁଡ଼ ଆଦତିଡ଼, ଇଦ୍ ବାଡ଼ ପୁନ୍‌ଡ଼ିଡ଼ ? ଆଦିଙ୍କ ବେନ ଜଗଡ଼ତିଙ୍କ ସାଙ୍ଗ ମାଡ଼ାନଙ୍କ ଆଲ୍‌ସିଡ଼ିଡ଼; ଅଣ୍ ଇଶ୍ୱରତେ ବିରୁଦ୍ଧି ଆଦତନ୍ ।

୫ ଆୟୁକ୍ ମିଡ଼ ବାଡ଼ ଇଦ୍ ଦର୍ମଶାସ୍ତ୍ରତାଦ୍ ବାକ୍ୟତିଙ୍କ ମିଡ଼ ଇଞ୍ଜି ଆଲ୍‌ସୁତିଡ଼; ଇଶ୍ୱର ମାନାଗାଙ୍କ ବେନ ଆମାତିଙ୍କ ଅଣ୍ ମାନ୍ ଲୋପେ ବାଦକାନଙ୍କ ପଡ଼୍‌ୟେ ଇସ୍ ମିୟେଣ୍, ଅଣ୍ ମାନ୍ ସାରେ ଅଦିକାର ମାଡ଼ାନ୍ ସେଙ୍ଗେ ବେଲାବା ଚିନ୍ତେ ମାଡ଼ିତନ୍ ?

୬ ଇଡ଼କେ ଅଣ୍ ଗାଲା ନାଗେ ଅନୁଗ୍ରହ ହିଦ୍‌ତଣ୍; ଆଦିଙ୍କ ଶାସ୍ତ୍ରତାଗ୍ ଲେକ୍‌ତାଦ୍ ମିୟେ, “ଇଶ୍ୱର ଆଂକାର ନାରୁଡ଼କିଂଙ୍କ ବିରୁଦ୍ଧି ମାଡ଼ିତନ୍, ଇଡ଼କେ ନମ୍ ନାରୁଡ଼କିଂଙ୍କ ଅନୁଗ୍ରହ ହିଦ୍‌ତଣ୍ ।”

୭ ଆଦିଙ୍କ ମିଡ଼ ଇଶ୍ୱରତାଗ୍ ମାନୁର୍; ଶୟତାନତିଙ୍କ ଦମକ୍ ଇମୁର୍, ଆଲେକେ ଆଦ୍ ମିୟାଗାଙ୍କ ମିରିଆଦ୍‌ତେ ।

୮ ଇଶ୍ୱରତେ ଗାରରେ ଆୟୁମୁର୍, ଆଲେକେ ଅଣ୍ ମିଇ ବକେଡ଼ ମାନ୍‌ତଣ୍ । ଆ ପାପିଲଡ଼ି, ମିଡ଼ କାୟୁକିଂଙ୍କ ଲେକେଡ଼ ମାଡ଼ାର୍, ମେଣ୍ଟେ ଆ ରେଣ୍ଟ ମାନ୍‌ତଡ଼ି, ମିଡ଼ ମିୟାଦ୍ ହୃଦୟତିଙ୍କ ଲେକେଡ଼ ମାଡ଼ାର୍ ।

୯ ମିୟାଦ୍ ଝେଡ଼କେ ଝିସାମ୍ ଆୟି । ମିୟାଦ୍ ଝେଡ଼କେ ଆୟିଝେ ଲେକାଡ଼ ଝେଡ଼କେ ଆୟି ।

୧୦ ପ୍ରବୁନ୍ ମୁନ୍‌ନେ ମିଡ଼ ମଡ଼କାର୍, ଆଲେକେ ଅଣ୍ ମିକିଂଙ୍କ ପରର ତେଏତିତଣ୍ ।

ମେଣ୍ଟେ ଅରୁଡ଼ୁକ୍ ଲିୟ ମାଡ଼ମାର୍

୧୧ ଆ ଦାଦାଲଡ଼ି ନୁ ଏଲାୟ୍, ମିଡ଼ ନିଜେଡ଼ ନିଜେଡ଼ ଲୋପେ ନିୟେ ମାଡ଼ମାର୍ । ବେନ ତାମୁଣ୍‌ତେ ନିୟେ ମାଡ଼ିତନ୍ କି ତାମୁଣ୍‌ତାଗ୍ ବିଚାର ମାଡ଼ିତନ୍, ଅଣ୍ ନିୟମ୍‌ତିଙ୍କ ନିୟେ ମାଡ଼ିତନ୍ ନୁ ଆଦିଙ୍କ ବିଚାର ମାଡ଼ିତନ୍; ଇଡ଼କେ ମିଡ଼ ଯଦି ନିୟମ୍‌ତାଦ୍ ବିଚାର ମାଡ଼ିତିଡ଼, ଆଲେକେ ମିଡ଼ ଆଦିନ୍ ପାଲନ୍ ମାଡ଼ାନଡ଼ି ଆୟୁଡ଼ିଡ଼ ମିଡ଼ ଆଦିନ୍ ବିଚାର ମାଡ଼ାନଡ଼ି ।

୧୨ ନିୟମ ମାଡାନଣ୍ଟ ନୁ ବିଚାର ମାଡାନଣ୍ଟ ମାଡର ଖେରଣ୍ଟେ, ଅଣ୍ଟ ରକ୍ଷା ମାଡାନଙ୍କ ନୁ ଆଖୁକାନଙ୍କ ପାରଦତଣ୍ଟ; ଇଡକେ ଗାରେତଡକିଙ୍କ ବିଚାର ମାଡଡୁଡିଡି, ମିଡି, ବେନ ?

ଗାଟି ଆଗେମାଡି କେତାନାଦ୍

୧୩ ଇଞ୍ଜେ ଉଡାର୍, ବେନଡି, କେଡୁଡିଡି, ନେଣ୍ଟ କି ନାଡି, ମାନାଡି, ଅଣ୍ଟୟ ଟାଉନଡାଗ୍ ଆଦତାଡି, ନୁ ଆଗେ ଅଣ୍ଟୟ ଏଣ୍ଟ ମାଞ୍ଜ ବେପାର୍ ମାଡି ଗାଟି ଲାବ୍ ମାଡିତାଡି;

୧୪ ଇଡକେ ନାଡି ବାଡି ଗଟେମ୍ ଆଦତେ, ଆଦ ମିଡି, ପୁନୁଡିଡି । ମିୟାଦ ଜିଝୁଣ୍ଟ ବାଡି ? ସେନେକଡିଙ୍କ ତହି ମେଣ୍ଟେ ତହି ଆସଡି ଗୁମାମ୍, ମିଡି, ତ ଆଦେଲେକେତଡି ।

୧୫ ଆଦିଙ୍କ ପ୍ରବୁନ ମାନ ଆଡକେ ମାନାଡି, ଜିଝେ ମାଞ୍ଜ ଇଦ୍ ମାଡିତାଡି, ବା ଆଦ ମାଡିତାଡି, ଇଦ୍ ରକମ୍ କେତାନାଦ୍ ମିକିଙ୍କ ସାୟ ।

୧୬ ଇଡକେ ମିଡି, ଇଞ୍ଜେ ନିଜେଡି ଆକାର୍ ମାୟଦିଙ୍କ ଗର୍ବ ମାଡଡୁଡିଡି; ଇଦ୍ ରକମ୍ ଗର୍ବ ମାଡାନାଦ୍ ସାୟେ ଆୟୟ ।

୧୭ ହେକେ ମାଡାର୍ ବେନ ନାରୁଣ୍ଟ ନିଜାତେ ପାଡିୟି ମାଡାନଙ୍କ ନାଡିୟି ଆଦ ମାଡକ୍, ଅକିଙ୍କ ପାପ୍ ତାଲଗିଡି ।

୫

ସାଉକାର୍ ନାରୁଡାଦ୍ ସତର୍କ ଗର୍

୧ ହୋ ସାଉକାର୍ ନାରୁଡି, ନା ଗଟି କେଞ୍ଜାର୍ । ମିୟାଦ ଝାଦାନ୍ ବିପଦ୍ ସେଙ୍ଗେ କେୟାର୍ ନୁ ଦୁଃକାମ୍ ଆୟମୁଟ୍ ।

୨ ☆ମିୟାଦ୍ ସମ୍ପତି ମାୟ ଆଦୁଡିଡି, ମିୟାଦ୍ ଚକାସିଲେଙ୍କ ହେଲୁମ୍ ତିହୁଡି,

୩ ମେଣ୍ଟେ ମିୟାଦ୍ ସୁନା ନୁ ରୁପାତାଗ୍ କାରକେ ପୟଡୁଡି; ଆଗେତାଦ୍ କାରକେ ମିୟାଦ୍ ସାକ୍ଷି ଆଦତେ ନୁ କିସ୍ ଲେକାମ୍ ମିୟାଦ୍ ମେହୁଲଡିଙ୍କ ପୟଡିଡି । ଇଦ୍ ତେରାନ୍ ଦିନାତେ ମିଡି, ଦନ୍ ନେଃଏସ୍ ମିୟେଡି !

୪ କେଜାର, ମିୟାଦ ଖାୟାନାଗ ପାଡ଼ିଯି ମାଡ଼ାନଡ଼କିଂଙ୍କ ବୁଝା ମାଡ଼ି ମିଡ଼ ଅଡ଼କିଂଙ୍କ ଦାମ୍ ଇଡ଼ିଡ଼, ଆଦ କିଡ଼କୁଡ଼, ମେଣ୍ଡେ ପାଡ଼ିଯି ମାଡ଼ାନଡ଼ତେ ପ୍ରବୁନ୍ କେଞ୍ଜୁଦାଗ୍ ଇଦ୍ ଗର୍ ଏଞ୍ଜୁଡ଼ତେ ।

୫ ମିଡ଼ ଜଗଡ଼ତାଦ୍ ସୁକାମତେ ନୁ ବଗ୍‌ବିଲାସ୍ ତଡ଼ ବାଦ୍‌କିଡ଼, ଆଞ୍ଜୁକି ଡିୟାନ୍ ଲେକାମ୍ ମେନ୍ଦୁଲ୍ ଆସ୍ ମିନ୍ଦେଡ଼ି । ଡଲାନ ଦିନେତେ ନିଜେ ନିଜେ ମାନ୍‌ଦିଙ୍କ ଶାନ୍ତି ମାଡ଼ିଡ଼ି ।

୬ ମିଡ଼ ଦାମ୍‌ମାମ୍ ନାରୁଡ଼କିଂଙ୍କ ଦକ୍ଷି ମାଡ଼ି ଆଞ୍ଜୁକିଡ଼ି; ଅଣ୍ ମିକିଂଙ୍କ ବିରଦ୍ ମାଡ଼େ ପାର୍‌ଝଣ୍ ।

ଦର୍ଯ୍ୟତଡ଼ ପ୍ରାର୍ଥନା ମାଡ଼ାର୍

୭ ଆଦିଙ୍କ ଆ ଦାଦାଲଡ଼ି ନୁ ଏଲାସ୍, ପ୍ରବୁ ଖାଦାନ୍ ଯାକ ମିଡ଼ ଦର୍ଯ୍ୟ ପୟସ୍ ମାନୁର୍ । ଉଡ଼ାର୍, ଉଡ଼ଦାନ୍ ଖାୟେତାଗାଙ୍କ ଗାଟି ଦାମ୍ କାୟା ଦରକ୍ତା ଯାକ ଦର୍ଯ୍ୟ ପୟସ୍ ମୁନେଡ଼ ନୁ ତେରାନ୍ ଖାୟାମ୍ ଖାଦାନ୍ ଯାକ କେପିତଡ଼ ।

୮ ମିଡ଼ ଗାଲା ଶକ୍ତିତଡ଼ ପୟସ୍ ନିଜେଡ଼ ନିଜେଡ଼ ଜିଞ୍ଜୁଣ୍ଡିଙ୍କ କଟ ମାଡ଼ାର୍, ବାଡେଙ୍କିଡ଼କେ ପ୍ରବୁ ଖାଦାନାଦ୍ ଦିନାମ୍ ଗାରେ ଏଞ୍ଜୁଡ଼ତେ ।

୯ ଆ ଦାଦାଲଡ଼ି ନୁ ଏଲାସ୍, ମିଡ଼ ବେଲା ବିଚାର୍ ଆୟୁଡ଼ିଡ଼, ଆଦିନ୍ ସେଙ୍ଗେ ନିଜେଡ଼ ନିଜେଡ଼ ଲୋପେ ପେରଲ୍‌ମାର୍, ଉଡ଼ାର୍, ବିଚାର୍ କର୍ତ୍ତାଲ୍ ମାର୍ ଗାରେ ନିସ୍ ମିନ୍ଦେଣ୍ ।

୧୦ ଆ ଦାଦାଲଡ଼ି ନୁ ଏଲାସ୍, ବେନ୍ ବାବବାଦିଡ଼ ପ୍ରବୁନ୍ ପେଦେରଡ଼େ ଗଟି କେସ୍ ମାଡ଼ତଡ଼, ଅଡ଼କିଂଙ୍କ ଦୁଃକାମ୍ ନୁ ଦର୍ଯ୍ୟତାଦ୍ ଝେଷଡ଼ ଇନା ପୟମୁର୍ ।

୧୧ ଉଡ଼ାର୍, ବେନଡ଼ ଗାଡ଼ସ୍ ଆସ୍ ମାଡ଼ତଡ଼ ଅଡ଼କିଂଙ୍କ ମାମ୍‌ମେ ଦନ୍ୟ ଇଞ୍ଜି କେଡିଡ଼ମ୍ । ମିଡ଼ ଆୟୁବନ୍ ଗାଡ଼ସ୍ ଗଟି କେଞ୍ଜି ମାଡ଼ିଡ଼ି, ମେଣ୍ଡେ ପ୍ରବୁନ୍ ତେରାନ୍ ପାଡ଼ିଯି ଉଡ଼ି ପୁଡ଼ିଡ଼ି, ଯେ, ଅଣ୍ ଦୟାତଣ୍ ନୁ କୃପା ମାଡ଼ାନଣ୍ ।

୧୨ ☆ଆଦିଙ୍କ ହୋ ନା ଦାଦାଲଡ଼ି ନୁ ଏଲାସ୍, ଶପଡ଼ ମାଡ଼ମାର୍, ସ୍ପର୍ଗତାଦ୍ ଆୟି ବା ପୃତିବିତାଦ୍ ଆୟି କି ମେଣ୍ଡେ ବାଡ଼ ବିଷୟ ଅସ୍

ଶପଥ ମାଡ଼ମାର୍; ଆଦିଙ୍କ ମିଛ ଗତି ହୁଁ ତାଦ୍ ହୁଁ ଆୟି, ଇଲ୍ଲଲେ ତାଦ୍ ଇଲ୍ଲଲେ ଆୟି, ବେଲାକି ମିଡ଼୍ ବିଚାର ମାଡ଼ାନାଗ୍ ଦଣ୍ଡ ଆୟୁଡ଼ିଡ଼ି ।

୧୩ ମିଛ ଲୋପେ ବାଡ଼ ବେନ ଦୁଃକାମ୍ ପାଏମ୍ ଆଦୁତନ୍ ? ଅଣ୍ଡ ପ୍ରାର୍ଥନା ମାଡ଼ିଣ୍ଡି । ବେନବା ଝେଡ଼କ୍ ମିନ୍ଦେଣ୍ଡି ? ଅଣ୍ଡ ପାଟା ପାରି ପ୍ରଶଂସା ମାଡ଼ିଣ୍ଡି ।

୧୪ ☆ମିଛ ଲୋପେ ବାଡ଼ ବେନ ରୋଗି ମିନ୍ଦେଣ୍ଡି ? ଅଣ୍ଡ ମଣ୍ଡୁଲିତେ ନେତା ନଡ଼କିଂଙ୍କ କାରୁଜିଣ୍ଡି; ଅଡ଼୍ ପ୍ରବୁନ୍ ପେଦେବ୍ରେତେ ନିୟ୍ ଉଠସି ଅନ୍ ସେଙ୍ଗେ ପ୍ରାର୍ଥନା ମାଡ଼ିଣ୍ଡି ।

୧୫ ବିଶ୍ୱାସ୍ତାଦ୍ ପ୍ରାର୍ଥନା ଆଦ୍ ରୋଗିଙ୍କ ରକ୍ଷା ମାଡ଼ିଡ଼ି, ମେଣ୍ଡେ ପ୍ରବୁ ଅଂକିଙ୍କ ତେଏଡିତଣ୍ଡି; ମେଣ୍ଡେ ଯଦି ଅଣ୍ଡ ପାପ୍ ମାଡ଼ିମାନ୍ତଣ୍ଡି, ଆଲେକେ ଅଂକିଙ୍କ କ୍ଷମା ହିଦତଣ୍ଡି ।

୧୬ ଆଦିଙ୍କ ନିଜେଡ଼ ନିଜେଡ଼ ଲୋପେ ପାପ୍ ସ୍ୱୀକାର ମାଡ଼ାଟ୍, ମେଣ୍ଡେ ସାୟେ ଆଦାନ୍ ସେଙ୍ଗେ ନିଜେଡ଼ ନିଜେଡ଼ ଲୋପେ ପ୍ରାର୍ଥନା ମାଡ଼ାଟ୍ । ଦାର୍ମାମ୍ ନାରୁଣ୍ଡିତେ ପ୍ରାର୍ଥନା ନାର୍ଗେ ପାଡ଼ିୟି ମାଡ଼ାନଙ୍କ ପାର୍ଦ୍ଦତେ ।

୧୭ ଏଲୀୟ ମାନ୍ ରକମ୍ ନାରୁନ୍ ମାଡ଼ତଣ୍ଡି, ଖାର୍ଯାମ୍ ଖାଡ଼ମାକି ଇଞ୍ଜି ଅଣ୍ଡ ଅଣ୍ଡୟ୍ ମାନ୍ତେ ପ୍ରାର୍ଥନା ମାଡ଼ତଣ୍ଡି, ମେଣ୍ଡେ ମୁଣ୍ଡ ଏଣ୍ଡିକ୍ ନୁ ଆରୁ ନେଲ୍ଲିୟ୍ ଯାକ ଦେଶ୍ତାଗ୍ ଖାର୍ଯାମ୍ ଖାଡ଼;

୧୮ ଅଣ୍ଡ ମେଣ୍ଡୁନ୍ୟାମ୍ ପ୍ରାର୍ଥନା ମାଡ଼ତାଙ୍କ ମୟଲ୍ତାଗାଙ୍କ ଖାର୍ଯାମ୍ ଖାଡ଼ତେ, ମେଣ୍ଡେ ବୁମ୍ତାଗା ପସଲ୍ ଆଦତା ।

୧୯ ଆ ନା ଦାଦାଲଡ଼ି ନୁ ଏଲୀୟା, ମିଛ ଲୋପେ ବେନ ଯଦି ସଡ଼ ହାର୍ଦିଙ୍କ ବୁଲ୍କା ଆଦତନ୍, ମେଣ୍ଡେ ବେନ ଅଂକିଙ୍କ ସଡ଼ ହାର୍ଦାଗ୍ ମାଲ୍ପି ତାଡିତଣ୍ଡି,

୨୦ ☆ଆଲେକେ ଅଣ୍ଡ ପାପି ନାରୁଙ୍କ ବୁଲ୍କା ହାର୍ଦାଗାଙ୍କ ମାଲ୍ପି ତାଡିତଣ୍ଡି, ଅଣ୍ଡ ଯେ ତାନ୍ ଆମ୍ବଡିଙ୍କ ଡଲାନାଗାଙ୍କ ରକ୍ଷା ମାଡ଼ତଣ୍ଡି ନୁ ନାର୍ଗେ ପାପ୍ତିଙ୍କ ଝିଡ଼ସିଦତଣ୍ଡି, ଇଦ୍ ପୁଡ଼ିଡ଼ି ।

ପୁନାବ୍ ଆର୍ବ୍
The New Testament in the Koya language of India:
ପୁନାବ୍ ଆର୍ବ୍ (Bible)

copyright © 2020 The Word for the World International and Koya Translation Samithi, Malkangiri, Odisha

Language: (Koya)

Contributor: The Word for the World South Asia

ପୁନାବ୍ ଆର୍ବ୍
ପୁନାବ୍ ନିୟମ୍ , 2020

The New Testament in Koya Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-07

PDF generated using Haiola and XeLaTeX on 6 May 2025 from source files dated 7 May 2025

72ff5787-bb80-584b-a1a0-0acd8a2fefae